



Komunikadu Imprensa

Dili, 28 Janeiru 2019

JSMP realiza treinamentu kona-ba direitu labarik no asesu ba justisa formal ba estudante eskola Sekundaria Públiku Palaban Oekusi

Iha 25 Janeiru 2019, JSMP liu hosi unidade advokasi realiza treinamentu ba *estudante décimo primeiro no décimo segundo ano* ba eskola Sekundaria Públiku Palaban Sub-rejiaun Pante makasar, Rejiaun Oekusi. Estudante sira ne'ebé partisipa iha treinamentu ne'e hamutuk ema nain 30, feto nain 15 no mane nain 15.

"Treinamentu ne'e hanesan aktividade kontinuasaun husi JSMP ne'ebé halo ona iha tinan kotuk ba estudante sira iha distritu sira seluk hanesan Distritu Bobonaro, Covalima no Baucau. Treinamentu ne'e ho objetivu atu hasae koñesementu estudante sira nian kona-ba direitu labarik, asesu ba sistema justisa formal no motiva estudante sira atu hili fakuldade diretiu iha universidade bainhira sira remata eskola sekundaria", dehan Diretór Ezekutivu JSMP Luis de Oliveira Sampaio.

Iha abertura treinamentu ne'e, Diretór Eskola Eekundária Públiku Palaban Sr. Cristino Nunes haktuir katak nia parte kontente ho atividade treinamentu ne'e, tanba materia ne'e importante no bele ajuda haklean liután disiplina sidadania ne'ebé estudante sira simu iha eskola refere.

Iha enseramentu, Diretór ne'e mós agradese ba JSMP tanba fasilita ona treinamentu ida ne'e ba estudante sira no hein katak ba futuro JSMP kontinua fasilita treinamentu ho materiá ne'ebé hanesan ba estudante sira seluk.

Treinamentu ne'e hetan partisipasaun másimu hosi estudante sira ne'ebé partisipa no partisipante sira hato'o sira nia preokupasaun kona-ba labarik sira nia direitu liga ho responsabilidade inan-aman sira nian no oinsá atu asesu ba sistema justisa formal kuandu inan aman la kumpri sira nia obrigasaun sira.

Hatan ba preokupasaun sira ne'e, JSMP resposta katak labarik sira hetan direitu espesial hosi familia, sosiedade no estadu tanba labarik sira fizikamente no emosioálmente seidak maduru, seidak iha kapasidade atu hola desizaun no seidak bele proteze sira nia-an. Inan-aman iha obrigasaun atu hakiak, fó-han (alimentasaun), tau-matan, proteze hosi risku, la halo diskriminasaun no fó oportunidade atu sira dezemvolve sira nia-an.

Entretantu kestaun kona-ba inan-aman la tau matan (abandona) nia oan sira, JSMP esplika katak inan-aman iha obrigasaun atu fó alimentasaun ba nia oan sira maibé karik iha labarik ruma

ne'ebé inan-aman la tau matan/la fó alimentu, inan-aman sei hatan ba krime ida naran krime la halo tuir obrigasaun alimenár iha artigu 225 Kódigu Penál (KP) ne'ebé nia kastigu hosi tinan 3 prisaun ka multa no kona-ba ezersisiu póder paternal tuir artigu 1758 Kodigu Sivíl (KS), Inan-aman iha dever tuir interese diak oan sira nian atu aseguara seguransa no saude oan sira nian sustenta, hare'e ba sira nia edukasaun, representa sira no administra sira nia riku-soin.

Kestaun kona-ba labarik sira nia asesu ba justisa (labrik sai vítima ka arguidu) JSMP esplika katak artigu sira ne'ebé fó protesaun ba labarik sai vítima mak krime maus tratus ba menór (tratamentu aat ba labarik) tuir artgiu 155 KP, krime koasaun seksuál ho agravasaun iha artgiu 171 KP konjuga ho artgiu 173 alinea (d) KP, krime violasaun ho agravasaun iha artgiu 172 KP konjuga ho artgiu 173 alinea (d) KP, krime prostituisaun infantil 175 KP, krime pronografia infantil iha artgiu 176 KP, abuzu seksuál ba menor iha artgiu 177 KP, krime aktu seksuál ho adolexente iha artgiu 178 KP, krime interrupsaun ba gravida iha artgiu 141 KP no krime infantisídiu iha artgiu 142 KP.

Kona-ba labarik sira sai arguidu, artigu ne'ebé fo protesaun mak artgiu 20 KP kona-ba inimputabilidade tanba idade (labele tula responsabilidade kriminal ba labarik sira ne'ebé seidak iha idade tinan 16) tanba ho razaun labarik sira seidak maduru, seidak iha kapasidade atu foti desizaun ruma no menus komprensaun kona-ba konsekuensia hosi sira nia hahalok ne'ebé sira halo.

JSMP observa katak atividade treinamentu ne'e lao ho diak no partisipantes sira mós ativu husu perguntas no fahe sira nia esperensia moris iha familia no sosiadade. Treinamentu ne'e realiza tanba hetan apoiu finanseiru hosi Embaixada Canada, Jakarta-Indonezia.

Atu hetan informasaun liutan favor kontaktu direktamente:

Luis de Oliveira Sampaio
Diretór Ezekutivu JSMP
Diresaun e-mail: luis@jsmp.tl
Telefone: 3323883 | 77295795